

CEDE Aruba ta haci encuesta basa riba necesidadnan di habitantenan di bario

A traves di su rednan social CEDE Aruba, ken ta promove pa trece hende y recursonan hunto pa un desaroyo sostenibel, ta haciendo un encuesta pa asina haya sa informacion concreto riba e necesidadnan y interesnan di habitantenan di e barionan rond Aruba.

Den e lucha contra e problemanan socioeconomico y social na Aruba, nan ta trece e gruponan meta den contacto cu por fortalece otro y semper cu tin oportunidad pa desaroyo social y educativo.

Manera ta conoci, CEDE ta contribui na un comunidad caminda hende di tur edad por desaroya nan mes. Nan ta kere cu desaroyo sostenibel den comunidad di Aruba ta factibel.

Un di nan proyectonan con-



oci ta Bario Unico e cual ta sigui sirbi como e team organisatorio pa e sesionnan di trainingnan aki, facilitando conexion entre organisacionnan riba e isla y facilitadornan cu experticio riba nan tereno, promoviendo un ambiente di desaroyo y colaboracion.

Un di e metanan crucial di

e proyecto aki ta pa fortalece e comunidad di e isla, duna centronan di bario y otro organisacionnan e recurso y hermentnan necesario pa crea un impacto social positivo.

Pa e motibo aki, nan a crea un encuesta unda e opinion di ciudadanonan ta hopi importante pa asina yuda nan me-

hora e barionan door di yena e encuesta rapido aki e cual tin como meta pa colecta informacion concreto basa riba necesidadnan y interesnan di e habitantenan di bario. E encuesta a ser desaroya pa Bario Unico bao guia di CEDE Aruba.

E informacion compila lo yuda Centronan di bario y otro organisacion den mehoracion di nan programanan, actividadnan y servicionan cu ta na beneficio di e comunidad

Importancia di henter e encuesta ta pa crea barionan prospero, sigur y diverso, unda ciudadanonan por conecta na Centronan di Bario cu ta bon ekipa cu programanan a traves di arte, cultura, deporte, boluntario y iniciativanan educativo, promoviendo tanto desaroyo individual y tambe comunitario.

Den encuesta aki ta puntra e persona den cua bario e ta biba, cuanto aña tin bibando den dje, kico ta e cosnan cu mas e ciudadano ta gusta y no ta gusta di su bario, si tin espacionan pa actividadnan den aire liber manera pa hende cana y pa usa bais, si tin bon servicio di bus, si tin espacionan recreativo, si tin espacionan pa hende cu tur tipo di habilidad, si tin bon iluminacion den su cayan y si tin acceso na servicionan cu ta bishita regularmente manera supermercadonan, scolnan, banconan, restaurant, entre otro.

E encuesta aki ta disponibel den dos idioma, Ingles y Papiamentu, tambe esnan cu a yena nan datonan caba, e dia di awe lo tin oportunidad di gana un premio. Algun ganado a ser anuncia caba.

Ex director di Utilities Aruba NV a conseha pa renegocia of rechasa acuerdo cu Eagle LNG

Recientemente den medionan di comunicacion local como tambe riba medianan social ta circula un carta, fecha 18 di october 2021, cu ex director di Utilities Aruba NV, ingeniero Richard Eman a manda pa minister di Labor, Energia y Integracion e tempo ey, Glenbert Croes, den cual e ta expresa su obhecion pa loke ta terminonan comercial di e acuerdo cu Eagle

LNG.

E ex minister a pidi e ex director y ingeniero opinion di Utilities Aruba NV riba e concepto di acuerdo proponi cu Eagle LNG pa suministro di gas natural pa WEB Aruba. Eman a indica primeramente den su carta cu Utilities Aruba no a participa den e negociacion entre WEB Aruba NV y Eagle LNG.

El a splica cu nana revisa e

acuerdo prepara pa Eagle LNG y cu nan no tin obhecion na e terminonan huridico general den e acuerdo aki, pero si ta opone na e terminonan comercial.

E ingeniero a sigui splica cu den un carta di Eagle LNG pa su persona cu fecha 18 di september 2020, e ta ofrece un suministro di gas riba un base di 'Usa y Paga', riba cual no tabatin ningun discusion di dje den e carta.

E obhecionnan principal di Utilities Aruba NV pa loke ta trata e acuerdo di Eagle LNG/WEB tabata primeramente e obligacion di compra pa 20 aña entre 7MM mmbtu y 4.0MM Mmbtu (Metric Million British Thermal Unit), cual ta e unidad usa pa midi e contenido di calor of balor energetico.

Di dos obhecion tabata e flexibilidad pa no mester cambia e cantidad di compra. Un maximo di dos biaha den 20 aña, despues a ser cambia pa tres.

Di tres tabata e termino largo di 20 aña cu por caduca su mes y di cuater tabata e punto cu e terminal ta keda den man di Eagle LNG.

Eman a remarca cu si acepta e acuerdo di Eagle LNG, manera e tabata riba mesa, lo tin como efecto cu e plan di Energia Renobabel pa logra cumplimiento cu e Acuerdo di Paris lo ser destrui completamente y local ta nifica cu net-zero pa 2050 lo no ta posibel

El a señala cu debi na e duracion hopi largo di e contract, Aruba ta core un riesgo grandi cu e tarifanan lo bira

impagabel y cu lo keda mara na nan.

El a sigui indica cu cambionan durante tempo di eheucion ta limita significativamente e libertad di movimiento di WEB y door cu Eagle LNG ta keda doño di e terminal, WEB lo keda mara na Eagle LNG pa semper.

Ademas no lo tin spaarmento di \$38MM/aña den divisa ni tampoco reduccion den tarifa di coriente.

Eman a recomenda pa tuma e siguiente pasonan pa haya gas natural pa WEB Aruba: el a remarca cu mester renegocia of rechasa e acuerdo di Eagle LNG cu tabatin, pa Utilities Group of RDA construi su propio terminal di LNG riba e tereno di RDA, negosha cu proveedornan di gas, Eagle LNG of otronan, pa yega na un acuerdo riba termino mediano cu e flexibilidad necesario y por ultimo, el a conseha pa implementa e plan di De-Carbonisacion proponi, cu ta inclui instalacion di turbinanan di biento di 130 MW, spaarmento di \$38MM/aña na divisa, un reduccion fuerte den emision di CO2 y reduccion di tarifanan di coriente.

